

四庫全書

經部

欽定四庫全書

經部

春秋說卷一至三

詳校官通政使臣夢吉

給事中臣溫常綏覆勘

謄錄監生臣任溥

謄錄監生臣黃鐘

謄錄監生臣嵇承羣

御製書洪容夔春秋說論隱公作偽事

春秋以三傳為近古後世注疏家愈遠愈奇而愈不得其正即如不書隱公即位左氏謂攝蓋引而不發似矣公羊以為桓貴則已失之惟穀梁一則謂成公志再則謂成人美終則謂輕于乘之國蹈道則未持論平正而不苟然三傳即能得聖人筆削之精義耶吾不敢信而後世操同室之戈炫獨出之見求勝人而反昧己比比是也如洪洛夔春秋說之論隱公直以為作偽曰拙吹求

實已甚焉其言蓋出於盧仝春秋摘微之緒論

盧仝
微曰隱

越次而立久不歸位外示攝而中實奪之故不書即位明春秋之所由作也是書久佚惟宋杜謨春秋會義採其說今於永樂大典散篇內袁驛得之

夫全去三傳幾千百年而客夔又去全幾四百餘年拾人唾餘而以為自出已見此何能欺千載之公論乎謂之為責賢者備猶屬左袒耳

欽定四庫全書

經部五

洪氏春秋說

春秋類

提要

臣等謹按洪氏春秋說三十卷宋洪咨夔撰咨夔字舜俞於潛人厯官端明殿學士事迹具宋史本傳是書咨夔自序稱自考功罷歸杜門深省作春秋說按本傳稱理宗初咨夔為考功員外郎以忤史彌遠又言李全必為國患為李知孝梁

成大所劾鶴秩家居者七年是書蓋是時所作也又本傳第稱咨夔所著有兩漢詔令聲抄春秋說諸書而皆不載其卷數朱彞尊經義考引吳任臣之言云止三卷而永樂大典吳潛所作咨夔行狀則謂春秋說實三十卷今考是書篇帙繁重斷非三卷所能盡潛與咨夔同官相契當親見其手定之本任臣所言蓋後來傳聞之說耳其書明鬯而考據事

勢推勘情偽議論尤多前人所未發如以書
公子友如陳為著季氏專魯之始以晉侯執
曹伯負芻而不為曹立君正為異日歸之之
地以書大蒐昌間為季氏示威于衆以脅國
人皆得筆削微意惟謂慶父出奔為季友故
縱謂劉子單子以王猛入王城為不知有君
頗有紕繆然棄短取長其卓然可傳者不能
沒也今兩漢詔令等書久已散佚此書亦無

傳本惟永樂大典尚多載其文謹衷輯編次
釐正訛舛仍分為三十卷以還舊觀至春秋
經文三傳各有異同今咨夔原本經文已不
可見就其所說推之知其大槩多從左氏而
間亦參取于公穀今並加案語附識其下又
自僖公十四年秋至三十三年襄公十六年
夏至三十一年永樂大典原本已佚而他家
經解又絕無徵引無從輯補今亦姑闕之焉

乾隆四十六年九月恭校上

總纂官臣紀昀

臣陸錫熊

臣孫士毅

總校官臣陸費墀

自序

帝王誥命訖于平王國風變于秦離聖人傷王者之不作因魯史修春秋以奉天命而立人極夫天命流行于人極之中無一息間斷人惟不知吾心有天而外求天謂吉凶禍福天未嘗定往往無天而動于惡然天雖有时而未定終必有時而定天者定則人者屈此人極之所由立也此春秋成亂臣賊子所以懼也彼亂臣賊子惟利是計豈懼夫空言之貶身後之辱哉懼夫天者定

而人者屈失其所以為利也故凡犯天下之清議冒天下之大罪能逭諸一時不能逭諸異日能逭諸其身不能逭諸其子若孫人誰無愛身愛子孫之念知天命有不可逭則欲動于惡將有所懼而戢此撥亂反正之筆所以有功于人極也且易春秋在魯皆所以司天人之契人欲窮而天理滅其卦為剝春秋二百四十二年純乎剝者也以齊桓霸天下始末求之每四十年當一爻陰愈進則亂愈甚盟宗之後晉以天下之權授之楚而

大夫專盟諸侯皆凜凜乎贊旂之危五陰之剥成矣其
末又以天下之權授之吳吳楚與越參立而交橫大夫
各乘顧其國禍亂極矣而獲麟于西狩亂極必治安知
無王者作此碩果不食剥所以不終于剥也春秋以傷
王者不作而始以幸王者復作而終以魯聖賢之澤未
泯一變可至道而託之以詔萬世天道至教聖人至德
備見于行事斷斷乎循之則治違之則亂得之則生失
之則死信人極非春秋不立也余自考功罷歸杜門深

省有感于聖人以天治人之意作春秋說天目洪咨夔

舜俞序

春秋說自序考證

第一頁後三行 不能追諸其子若孫句考平齋集本
無若字今從永樂大典原文

第一頁後三行 知天命不可追句平齋集天命作天
定今從原文

第一頁後七行 以齊桓霸天下始末求之句平齋集
避宋欽宗諱以齊桓作齊威今從永樂大典改正後
倣此

第二頁前七行 違之則亂三句平齋集違字作失字
又無得之則生二句今從永樂大典原文增改

欽定四庫全書

春秋說卷一

宋 洪咨夔 撰

隱公上

元年春王正月

元者乾之元春者乾之亨正者乾之利貞皆天德也
王者有是德而後可以王天下諸侯有是德而後可
以君一國而承事王者嗣立之始書之欲其自始至
終與天同運也其以正月係之王王者三代之通稱

天王則獨指周而言三代所尚雖不同時以作事商
周末始不同于夏也第自昔帝王繼天出治莫重乎
正朔正月上日受終于文祖正月朔旦受命于神宗
有所授則有所受故正朔具而謹始之道備春秋五
始有正而無朔聖人猶愛餼羊豈以為可畧哉魯君
纂服皆不告于天王其于稟承正朔初政已失之故
不書朔以著其無所承而書正所以存王也即位或
書或不書行即位之禮則書公之不書以攝自詭而

禮不行焉自有天地以來君位無代匱者堯老舜攝
實則相堯周公攝政成王已立皆非代君也以攝欺
天下自公始世子必擣于王公非所擣國統必屬於
父公非所屬按穀梁傳有先君既勝其邪心以
與隱句則隱之立非無父命也揆之
于禮反之于心而不安于是謂桓幼而攝需其長乃
歸之立十有一年而不歸果攝也哉始求遜國之名
終享擅國之利作偽日拙公之心迹敗矣

三月公及邾儀父盟于蔑

記私盟之始也盟非治世所尚爾許我虞而後有盟
未有久而可賴者魯之于邾為近公據非其據中不
自安故扳援以為密傳謂攝位求好得其情矣附庸
例書字如蕭叔之類

夏五月鄭伯克段于鄢

舜之于象純乎天周公之于管蔡奉乎天鄭伯之于
段人勝而天滅矣詩曰兄及弟矣式相好矣無相猶
矣段之不弟罪固不可揜莊公猶之又甚之宿怨以

斃段遷怒以讐姜大惡其可悔乎夫克莫善于克已
莫不善于克人莊不自克而以克其弟無人心矣聖
人書克以著其心嚴矣哉

秋七月天王使宰咺來歸惠公仲子之賈

公以庶長違父命而自立託之攝以欺國人王室所
當問也周方衰微不能問而致君大義周禮未泯力
雖不能問而不容不覺其欺公立數月天王首歸桓
母仲子之賈以示桓之當立且大其事使冢宰來失

禮之中蓋猶有微權在公卑王室偃然受其禮曾無惕懼之意王之微權亦不得行焉以矯枉過正之禮為啓寵納侮之端坐而論道者不得不任其責故宰以名貶王繫之天尊周也仲子繫之惠公正桓也其不曰夫人贈非所當贈也一語而數義具

九月及宋人盟于宿

有歎于己而求于人雖屈己納交不以為辱情之迫也公以千乘之重下與宋之微者盟蓋居攝而中饋

方求好于宋以植其黨雖微者抗禮不敢較也聖人

恥之故書及不書公

按此條經文三傳皆以為魯以微者與盟故不書其人惟趙匡

以為公親與盟諱而不書原文所云蓋本趙氏之說

冬十有二月祭伯來

天子之宰方以非禮辱于魯祭伯又不命而出無名而來周之紀綱蕩然矣凡書來皆莫名其所以來之意

意

公子益師卒

平王之喪公不唁惠公之葬公不臨于所厚者薄無所不薄也先公之子益師何有哉故卒而不曰

二年春

正以正天下之不正王之大柄也公不知有王立非其正踰年矣王不知所正焉故自此終公之身無王正

公會戎于潛

記私會之始也周禮著服世一見其朝也周公置之

國門之外所以遠之也公方攝位戎窺其有慊然不
自安之心敢牽帥為潛之會公亦幸戎之親已會之
如敵已不以為嫌焉春秋以戎敵公其譏明矣

夏五月莒人入向

春秋無義戰強凌弱衆暴寡自書莒人入向始上無
明天子下無賢方伯故小國亦得以擅其兵也
無駁師師入極

極如顓臾須句之類皆附庸也無駁以未賜族之大

夫將尊師衆以壓之極不支矣在易之師剛中而應行險而順以此毒天下而民從之貴乎以順動也入者內不受之辭豈順動乎

秋八月庚辰公及戎盟于唐

春會于潛戎請盟公辭焉亡幾何遽為唐之盟盟之不足恃公固知之矣而顧汲汲盟之以修戎好內歎故也徐戎並興而有費旣築與征同日其嚴于禦戎若此公顧援而進之既會而盟如待大國魯自此卑

矣時月日具聖人之慮益深

九月紀裂繻來逆女冬十月伯姬歸于紀

昏姻人道之始紀侯以未命之裂繻來逆女斂吾女
矣歸妹永終知淑女歸之正不正以禮不以禮可以
占終焉君子是以知伯姬之不能有紀也

紀子伯莒子盟于密

子伯子帛其說不一大要紀莒自為盟非為魯也以
告魯而書也

十有二月乙卯夫人子氏薨

春秋之始無以妾母為夫人者此夫人蓋公之妻也
公以攝欺世不以君禮自處妻則用夫人之禮以貴
之小人揜其不善而著其善君子視之如見肺肝故
子氏不書卒而書薨以成其為君夫人書薨而不書
薨以見其不敢自正其為君夫人

按夫人先君薨者
經文例不書薨非

于義有所貶損
也原文非是

鄭人伐衛

大司馬九伐之法天子聲罪而討也列國燕伐燕耳
鄭以公孫滑奔衛衛人為之取廩延故執此辭擅兵
以攻衛是何責人之周而罪己之畧也莊公志于殺
弟大叔段奔共其子滑奔衛父子不相保公之怒可
少霽矣又伐衛以討其藪逋夫極之于其所往施之
諸臣猶不可況猶子乎伐國非將卑師少而人之罪
鄭深也

三年春王二月己巳日有食之

日為衆陽之宗而陰犯之故食猶君德本清明而有
蠱之者其明傷矣歷家推剥蝕有定數然有道之世
三光全而寒暑平今謫見于上人君能寅畏修省以
還吾清明之天則咎徵轉為休徵矣伐鼓用幣特其
末

三月庚戌天王崩

舜五十陟方乃死而為法于天下可傳于後世平王
在位五十一年非不久也泰離之風竟不復振其崩

至無以為葬悠悠歲月志不自強故終于弱而已矣
顧命一書志王崩之變禮為多而康王初立召畢二
公率諸侯入應門左右則臣子奔喪之常百世不與
易也天王之崩赴于魯公不奔喪亦不遣使以弔蔑
周甚矣夫君親之尊一也公不知臨親之葬尚安知
有王公不知有王則其臣安知有公非自隳其坊乎

夏四月辛卯尹氏卒

天子之大夫外交于魯故尹氏之喪告書尹氏去其

官謹世卿非人之戒也王者以德詔爵其賢耶象賢而用之雖父子並為司徒不害緇衣之美其不賢耶一日不可尸厥官況可世官如尹氏乎故用者當論賢不賢不當論世不世尹氏族強不顧禮法而外交越百九十餘年竟成王子朝之禍

秋武氏子來求賻

武氏世官也子未成人者也桓王之立以未踰年改元未出命遣使故武氏子以自來書其使非所使求

非所求則冢宰之責也魯于天王之喪雖赴不弔王室不足於葬而求聘焉是媿魯也夫猶有望于魯也夫

八月庚辰宋公和卒

胡文定謂諸侯曰薨而書卒以不請命于王而自立不與其為諸侯也劉原父荅溫公書謂薨者臣子之辭溫公亦以為然合而觀之可見薨魯卒諸侯之意冬十有二月齊侯鄭伯盟于石門

鄭去周為適在周為客故列國喜于交鄭伯主重于
得鄭外寇急于樓鄭春秋書鄭之交于諸侯為多石
門之盟其首也信不由中盟何足尚哉

癸未葬宋穆公

宋殷後其爵公王請謚于天諸侯請謚于王不請而
謚非王制也死喪相恤邦交之常故魯會其葬然天
王之崩屬適不會周而會宋是不能三年之喪而總
小功之察也

四年春王二月莒人伐杞取牟婁

封建之法先王取地上有水自然之比而為之所以
協比上下之情使之一德以尊王室而安生民也故
分疆畫壤有其制車服旌旗有其等講信修睦有其
禮救災卹難有其義而連有帥卒有正州有牧小大
相維內外相統賜弓矢然後得專征其所征惟不共
王命是問非以從欲濟忿而便其私也是以王室尊
安民生寧一五等之爵各保其社稷以無墜厥祀及

其衰也王者號令不行於諸侯大不字小彊不恤弱以勢力相雄長以智謀相吞噬無日不惟干戈之尋周初千八百國至春秋存者無幾而封建之法壞矣莒前年入向今年伐杞取非其有之邑區區蕞爾之國猶擅兵若是况大于莒者乎書取深疾之

戊申衛州吁弑其君完

春秋弑逆非一國衛其首也衛本紂畿內之地成王以封康叔其政化後革而先衰故夷王時變風詩作

實居十三國之首莊姜莊公夫人以公子州吁之母
上僭而失位故作綠衣戴媯生子完莊姜以為己子
而州吁弑之姜送戴媯大歸故作燕燕州吁弑媯之
後莊姜推原禍亂之本以為由已不見答于先君之
所由致故作日月禮莫嚴于嫡庶之辨莊公以私嬖
納州吁于邪又屬以兵是授之弑完之刃也夫愛始
于衽席變形于閨門而禍流社稷一至于此州吁絕
公子之屬籍而莊公不父之罪隱然見于其中可為

萬世之戒

夏公及宋公遇于清

二君志于會而為草次不期之遇其心所存不欲國人窺之也蓋公以攝居位不能不以桓為慮宋繆公致國于與夷而公子馮奔鄭殤公亦不能不以馮為憂二君之隱于中者畧同故為此遇也

宋公陳侯蔡人衛人伐鄭

執狐疑之心者來讒賊之口人之得以間吾骨肉之

好必中心隱然之間有以名之也宋殤公得國于繆
公繆公之子馮奔鄭鄭人欲納之未有迹也而殤公忌
馮之心已潛動于中故州吁得以伐鄭除害之語中
之遂興此師自此凡十一戰至于身弑馮立然後已
豈惟讒言能禍人國哉忌馮一念之動天昭昭乎臨
之矣况黨州吁弑君之賊春秋所必誅乎

秋翬帥師會宋公陳侯蔡人衛人伐鄭

伐鄭之役衛州吁使公孫文仲將而宋公身在兵間

宋志明矣或者國之大事師者君之大柄帥師直以
翬書何哉語曰其身不正雖令不從宋伐鄭以除公
子馮之害與公之不誠于遜桓機心械事適相為符
故翬逆探其心固請從宋以遂其專而公惟其言之
聽也異日激成鍾巫之變實兆于此

九月衛人殺州吁于濮冬十有二月衛人立晉

弑逆之賊夫人得而討之無所逃于天地之間也州
吁弑君自立其民不和而求寵于諸侯使諸侯少誰

何之罪人之得易耳宋陳乃合力左右之黨遂立矣
然未得魯不敢以為安使魯能請于周聲其罪以王
命討誰敢不從宋為衛請翬帥師以從伐鄭則魯亦
與之黨益盛矣而其民之未和猶如故也石碏以王
觀為可則是當時諸侯之犯名義非王命不敢以自
安使王室能以大義號召諸侯誅一不義紀綱振而
風采變中興不難惜其君臣之不自亢也衛人以討
賊望之諸侯諸侯不足望望之魯魯不足望望之周

周又不足望其志良可悲矣碏之謀行殺州吁于陳之濮稱人以殺國人殺之也天尊地卑而乾坤立名義之在人心未嘗少蝕故可以義動而不可以威刦可以禮率而不可以力制苟失其心泰山累卵矣州吁材非不勇兵非不銳黨非不盛而國人之心終不可強而和必討賊而後已雖殺之于濮幾于失賊而羣心之勃塞自是而始舒豈非康叔之化在人未泯乎公子晉稱人以立國人立之也立無王命猶為不

宜立然國人之心于是乎定矣故曰民為貴君為輕

五年春公觀魚于棠

戒懼之心易移耽樂之情難制公子翬飛揚之志勃
勑乎不可遏公顧玩細娛忘大患而觀魚于遠地之
棠孟子所謂不賢者雖有此不樂也非不樂也所樂
非所樂也况一歲之事在春田不之蒐耕不之省而
肆為遊觀之舉不知務甚矣諉曰春獻王鮪將登寢
廟獨無敵人乎

夏四月葬衛桓公

按史記衛始伯也頃侯時夷王命衛為侯至平王命武公為公自是皆僭公也春秋書衛以侯卒而公之著國人之私也君弑賊不討不書葬桓公之葬雖緩賊討可無憾矣

秋衛師入鄭

鄭間衛亂而侵之衛甫定即入鄭修怨何其亟也兵法出其所不意衛之遂賊閏八月而後討桓公十有

四月而後葬州吁用兵暴虐瘡痍未瘳宣公自外
初立上下之情未孚鄭固不虞其遽及我也師一舉
入其國其得兵家之利乎春秋正誼不謀利書入甚
之也

九月考仲子之宮初獻六羽

仲子不得並配于惠公之廟故為之別築宮以祭而
因姓以名宮公以攝欺世今五年矣其欺久而不續
則人將得而窺之故又為此示國人以將遜之意而

申其欺夫不敬其親而敬他人者謂之悖禮公于葬親不屈半趾以臨窆而以盛禮施之先君之妾其果出于是心之真乎成王賜周公以天子禮樂魯自是僭用八佾而仲子之廟落成降殺用六婦入無武事故不言佾而言羽初獻六羽以見前是之皆八也又以見他廟之八猶故而仲子則六也又以見宮非所當宮羽非所當羽特飾欺之具也

邾人鄭人伐宋

宋再挾衛以伐鄭又取邾田其不義可知邾鄭所以合而伐之也是役邾倡而鄭和故邾以附庸序于鄭之上重主兵也春秋無義戰而多忿兵使志足以御氣禮足以制情方將自責自修之不暇何暇連兵以伐人而逞其報復之私哉此所以兵無稅駕之期民無息肩之日

螟

大田之詩曰去其螟螣及其蟊賊毋害我田穉而螟

居其首春秋不書蠭及蟻賊之害而書螟與詩意合
蓋螟為食苗心之虫視食根節與葉為特重故謹天
戒而書之夫人心受病則百骸不能以自立君心不
正則萬化不能以自美民心渙散則國脉不能以自
長公觀苗心之螟盍知所警乎

冬十有二月辛巳公子彊卒

彊卒書日恩禮厚也以臧僖伯之賢葬之加一等未
為過然公之為人工于飾欺方諫如棠詭辭以拒之

生無旌禮死則厚葬以蓋其憾不情甚矣

宋人伐鄭圍長葛

天理人欲相為消長人欲日長則天理日消人欲窮則天理滅矣宋繆公舍其子馮而歸國于與夷其志宜無望與夷之撫馮猶已之撫與夷也而殤公撫存之不加忌克之是用馮遂出奔于鄭又極之于其所往必欲使無寄足之地再挾弑君之衛以伐鄭亦足以快其私矣而馮不去害不除不能一日忘也長葛

之圍逾年不解必取而後已人知其為報鄭吾知其
欲急鄭而蹙馮也甚矣滅天理而窮人欲也

欽定四庫全書

春秋說卷二

宋 洪咨夔 撰

隱公下

六年春鄭人來渝平

公穀曰輸左氏曰渝詩載輸爾載輸墮也易復即命渝渝變也輸平渝平辭雖不同同於敗其成也魯有孤壤之憾于鄭頃嘗從宋伐之其後鄭入宋郢公託行人失辭而弗救蓋與鄭平矣莊公深狡其間魯宋

之好猶張儀所以間齊楚方魯宋之好合則求與我
平迨魯宋之情虧則其平遂變玩魯于股掌之上也
弭怨聖人之所深喜起戎聖人之所深惡特書來渝
平鄭之機心呈露無餘矣

夏五月辛酉公會齊侯盟于艾

公初有憾于齊鄭而求好于宋鄭平而宋遂睽宋睽
而鄭復離前失乎宋後失乎鄭魯之勢孤矣於是與
齊解仇為艾之盟既而會齊及鄭參盟中丘為師期

以伐宋公可謂巧于植黨矣

秋七月

冬宋人取長葛

去年圍今年取守者之力窮取者之力亦窮矣宜殲
公有弗戢自焚之禍

七年春王三月叔姬歸于紀

諸侯一娶九女諸娣從之祁祁如雲一日俱從也伯
姬歸于紀已數年其娣叔姬始歸之豈禮也哉二女

同居其志不同行故刑于二女為難况其君之袂不如其娣之袂良尤易于上僭委小星之命安江沱之分惟情之止乎禮義者能之叔姬之賢必有見乎此

滕侯卒

諸侯薨赴以名滕失禮不以名赴故魯史不得而記之春秋亦不得而書之亡日亦然

夏城中丘

用民力于夏非時也不務德而益城非政也不城外

邑而城內邑非地也

按杜預左傳注中丘在瑯琊臨沂縣東北則魯之外邑也洪咨

變以為內邑蓋誤讀公羊傳中丘者何肉之邑也句而不知公羊傳內字第作魯字解耳

而公汲

汲乎修舊城豈非為內難之備乎吾能以德為險以道為藩以人才為干城以民心為保障中丘雖不城人將畏服之不暇若猶未也舟中之人皆敵國石城湯池何益哉

齊侯使其弟年來聘

齊非無他卿大夫可使而使弟年來聘親乎魯也時

鄭伯有弟不能和協餉其口于四方隱公以遜弟為名攝位七年未知致國之日齊僖乃能以玉帛之聘屬之介弟友愛之情見矣然位不期驕祿不期侈以貴公子使之游列國交諸侯豈所以為愛乎異時其子無知秩服比于太子卒釀襄公之禍此實胚胎之

秋公伐邾

公初即位首求好于邾為蔑之盟曾幾何時遽有是伐蓋攝位之始他國未有我親者故親邾以為媒既

而宋盟戎盟齊又盟蕞爾邾何足顧恤於是棄好啟
戎反為宋討將恐將懼惟予與汝將安將樂女轉棄
予書伐邾以見公二三其德

冬天王使凡伯來聘戎伐凡伯于楚丘以歸

中外之防自有定制少有忌憚其敢凌天子乎公之
初攝假戎為重既會于潛又盟于唐滋他族于其室
而天王之使屢辱不報戎知魯厚于戎薄于周有所
侮而動間凡伯之來聘伐之于楚丘以歸聲搖氣撼

旁若無人職魯之繇也故書伐以大天王之使重魯
之責書楚丘以罪衛之不救書以凡伯歸以罪凡伯
不能死

八年春宋公衛侯遇于垂

遇者不期而會期而會亦以遇名遇之詭者也殤公
之不義宣公之無道味同氣合以幣交而為是遇其
同人于宗谷者乎

三月鄭伯使宛來歸祊庚寅我入祊

鄭玩魯如嬰兒操縱闔閭皆在其術中前年方來渝
平今又使宛歸祐其志在于得許田故先以祐餚我
使動於利而惟已之從也鄭以宣王母弟賜湯沐邑
于泰山下而近于魯魯垂涎非一日特未有以發其
機鄭莊交惡于周舉以歸我公不顧禮義之逆順即
入而有之豈惟勢利之交驟睽而忽合為可羞乎非
所當爭取非所當取逆計王之不復東巡而擅地以
行其私無周之心著矣

夏六月己亥蔡侯考父卒辛亥宿男卒

諸侯不生名死以名赴故書蔡宣公葬宿男不葬會則書不會則不書

秋七月庚午宋公齊侯衛侯盟于瓦屋

周禮有司盟之官諸侯有盟王朝實司之成王賜周公太公之盟是也春秋則私盟不告于王忠信交喪盟詛滋彰于是乎又有參盟瓦屋參盟之始也是盟齊侯平宋衛宜主會而首宋蓋殤公恃強蔑義銳然

有雄長與國之意故相與陽尊而陰貳之未幾齊合
魯鄭致伐何盟之足恃哉

八月葬蔡宣公

九月辛卯公及莒人盟于浮來

道義明則君位尊紀綱修則國勢重顥顥卬卬如圭
如璋人將望而起敬何敢易而侮之公以周公之系
千乘之國位勢非不崇也而莒敢以微者敵我于浮
來蓋人求于我則我重我求于人則我輕公有求于

宋而宋以卑者盟于宿有求于戎而戎以小國盟于唐今又汲汲于莒而莒得以人盟之重之為泰山輕之為鴻毛在我而已此君子所以戒自侮也

蠅

冬十有二月無駭卒

公子益師公子彊者賜族之大夫無駭俠皆未賜族之大夫若曰無駭以滅國去族終其身是聖人絕人自新之塗也其可哉

九年春天王使南季來聘

明王奉若天道樹后王君公承以大夫師長上之臨
下下之事上等級相承如堂有陛所以定民志而立
人極也故諸侯知所以事天子則大夫知所以事諸
侯大夫知所以事諸侯則陪臣知所以事大夫廉陞
之分明僥覲之志絕天下國家可保也否則下陵上
替無以事上其何以使下乎魯周公之後四方於是
乎觀禮我知尊周列國誰敢不尊周周尊則魯亦尊

矣公即位九年未嘗躬執玉帛以朝王靈輕辱間年再聘且侈然傲視莫之答撤藩夷級既無以示絜矩之道則公子翬無君之心其可遏乎書王以天天尊地卑截然之大分不以世道陵遲而遂隣也

三月癸酉大雨震電庚辰大雨雪

禍亂天所以開聖人災異天所以愛人君鍾巫之禍機已成八日之間變異沓至陽方淫泄而為震電陰復堅凝而為大雪天畏棐忱懵不知悟而危亡應之

矣故嘗謂春秋家以某變占後日某事之應不若以
某變推前日某事之感

俠卒

夏城郎

按左氏元年夏四月費伯帥師城郎郎之有城舊矣
城之未幾而又城非有警遽何用民力之亟耶觀其
城皆以夏城中丘城祝丘亦以夏非惟農時有妨而
前役之苟簡滅裂可想而知已掌固掌城郭溝池之固圖

之堅也魯人三郊三遂峙乃楨榦備之素也土功龍
見而戒事火見而致用火昏正而裁日至而畢作之
時也儲峙於未役之先興作於農功之暇而裁於盛
陰用事之時霜潦斂縮土脈凝栗雷轟雲杵易為堅
密用能一勞而永逸夏則陽氣張而土脈奮凝者渙
而栗者疏不可以為固宜其為異時屢戰之地

秋七月

冬公會齊侯于防

宋致忿於鄭屢矣至此鄭挾王命告齊魯而伐之以報長葛之役齊欲從鄭而伐宋則瓦屋之盟背之為不義欲助宋而卻鄭則王命之臨違之為不恭故與公會而謀之謀其私也謀定而後會鄭于中丘為師期

十年春王二月公會齊侯鄭伯于中丘夏翬帥師會齊人鄭人伐宋

宋殤公懼鄭莊公黠懼者恃強以逞黠者用深以濟

觀克段于鄢鄭伯於手足骨肉之間猶任智數以勝之况謀敵乎桓王即位周鄭交惡王之待鄭鄭之事周可知矣而鄭欲釋憾於宋將合與國未必其我從於是假尊王之名以宋公不共王職矯王命而告伐其用心險為術深齊魯皆在其牢籠鼓舞之中而不自知故中丘之會伐宋之役皆鄭意也而主之以齊至得地則歸之于魯主之齊則尊王者鄭之公歸之魯則取邑者魯之私其智數何如哉翬再書帥師會

伐之專無君之心不可復過矣

六月壬戌公敗宋師于菅辛未取郜辛巳取防

公初即位以宅非所據求好於宋宋乘其怠使微者與為宿之盟公不暇與之較也而於心終不平故勉強從翬會伐鄭之後鄭入宋郛弗救至是挾齊鄭合攻之勢又親敗之于菅十日間連取兩邑逞憾何其烈乎再書取甚之也

秋宋人衛人入鄭宋人蔡人衛人伐戴鄭伯伐取之

鄭師在郊而宋衛入鄭用力為甚易擣其虛也宋蔡衛伐戴而鄭還師伐取戴用力為尤易制其憲也蓋鄭伯巧于兵潛軍敗燕三覆衷戎皆出人之不意而此舉為尤巧方宋人乘勝逐利移師以伐戴雄心益張驕氣可掬視戴蓋囊中物也而竭三國弩末之力不能取戴鄭乘三國之憲且戴已搖于是談笑收漁人之利而戴為鄭有是宋獵而鄭獲也其曰併三師取之過矣

冬十月壬午齊人鄭人入郕

鄭以畿內伯為王卿士屬近而勢密果能推誠尊周
何謀之不濟而義不勝利公不勝私取麥取禾歸祊
易許每有無周之心王亦心薄之然矯權竊命猶足
以號召與國制勝敵邦故伐衛鄙以王師入宋郢以
王師告齊魯以王命郕人不會又討其違王命鄭師
所至輒以勝告假王室之威也齊桓晉文之伯挾天
子以令諸侯其實莊公開之

十有一年春滕侯薛侯來朝

歎者幸人之親已盈者樂人之尊已公內歎外盈故
偃然受非禮之朝也且罕嘆武氏子及凡伯南季之
來傲視王室曾不遣一介拜賜何望朝周魯不知朝
周滕薛乃旅朝于魯受之安乎况小國之仰大國如
百穀之仰膏雨故相與盡事大之恭而能焉公不自
能能能乎人哉

夏公會鄭伯于時來秋七月壬午公及齊侯鄭伯入許

伐許之役謀之時來而後動合三國之兵以壓蕞爾
之邦志在于得也既入其國乃知非義齊以歸之魯
而魯不敢有歸之鄭而鄭不敢居卒使許叔公孫獲
分東西偏處之以此見義理之在人心雖人欲橫流
中未始泯滅也

冬十有一月壬辰公薨

誠者物之終始不誠無物公與桓皆庶而公長嗣以
長立國人未必有異議也公顧以攝自詭攝可暫不

可久久攝而不歸上帝臨女詎可以智力欺哉公子翬窺見其不誠於遜桓於是進殺桓之謀方進是謀公聲翬罪而誅之猶可遏讒人交亂之萌而且聽且卻特以菟裘將老為遷延展轉之計翬之反諧所以得行於桓也故賢公以遜愛之過也罪之以篡疾之過也善不至遜惡不至篡權其心而論之其惟慕遜國之美名貪有國之實利而為偽乎偽未有不敗者也夫君臣之分猶乾坤之不可易公雖以作偽賈禍

魯為秉禮之國亂臣賊子宜即討亂臣賊子之不討
通國之罪也與國之罪也方伯及天王之罪也薨公
而不地不葬春秋所以存天地之大義明古今之大
戒而立人極也歟

欽定四庫全書

春秋說卷三

宋 洪咨夔 撰

桓公上

元年春王正月公即位

位天位也有天德者可以居之君初嗣位稱子踰年
改元行即位之禮而後稱公重居正之始也鼎之象
曰君子以正位凝命位得其正則行之於身布之於
國無一不得其正而天命為可凝隱公以攝自詭非

正也公以篡立不正抑甚焉方隱之攝公固望其踐
將遜之言日復一日歲復一歲久假之怨深矣羽父
逆探其心反譖之遂成鍾巫之變紛脣得食公之罪
尚焉逃天王不討與國不問嫁其罪於爲氏而揚揚
行即位之禮如嗣立之常天理滅矣故春秋不沒其
實以著其無忌憚之心

三月公會鄭伯于垂鄭伯以璧假許田夏四月丁未公
及鄭伯盟于越

矚人之危而撼之所圖無不濟乘人之疑而刦之所
請無不從蓋人方處危疑之地其心虛其氣歎弦聲
可以落雁鞭影可以行馬孤鳴可以嘯衆鶴唳可以
走敵中其機也鄭伯前以祊歸我志在許田而田未
入者魯如京師朝宿之所隱公難於輕與猶擬議而
未決公犯天下之大惡人得而討此心蓋搖搖其危
矣莊公坐窺其機謂許田可撼而刦於是又要公為垂
之會以璧而請之名假以飾其譙實刦以濟其欲公

亦幸於大謬之不問屏息退聽以因歸之隱公累年
反覆躊躇而遲於與者一旦墮其掌握中矣凡弑立
之君列於會盟則不復討故公亦乘其獲田之喜約
為于越之盟兩得所欲豈暇顧義理之安哉

秋大水

水生于天一成于地六浮天行地周流不息如人之
氣血運於一身之中不適其平則四肢百骸皆為受
病之處此所以居五行之先也况天人精祲相為感

通公之逆節悖理以陰干陽人飲其忿天泄其怒故水不潤下之變於初年見之

冬十月

二年春王正月戊申宋督弑其君與夷及其大夫孔父
孔父義形于色隱然有虎豹在山之勢故華督必先
翦孔父而後敢行無君之志賢者之係國安危係世
有無若此可不重乎魯大惡春秋每為之諱使大惡
果可以諱而隱亂賊將肆行而莫之畏綱常不立矣

故假他國以行王法而魯之罪自著宋督之弑執簡謹書昭然如日月公于此不待壞室瀦宮而獄已啟矣孔父書大夫以勸臣子之不失職

滕子來朝

隱末年滕偕薛來朝書侯公立來朝書子自此終春秋之世以子書時王所黜也或疑周之號令不行于諸侯久矣何能黜滕之爵然能錫命則能黜爵矣王政不綱能黜小國之爵不能黜大國之爵而賞行于

其大罰行于其小尤見衰世之政若謂以朝篡君春
秋降而為子則會盟之齊鄭皆可降何獨施于滕且
惡惡及子孫乎若謂自貶以損貢如子產稱鄭伯男
也之類則前年方以長薛為榮今遽自貶二等以辱
其先非人情也穀梁註為長凡諸侯之朝于公直書
來朝其貶自見

三月公會齊侯陳侯鄭伯于稷以成宋亂

大宰督與司馬孔父爭柄於是外交公子馮以傾之

既殺孔父遂弑殤公而立馮此宋亂之所由來也而
宋亂猶未成者有能討賊誅督亂根絕矣公以賊黨
賊合齊陳從鄭為稷之會取賂而立華氏督既相莊
公又相閔公歷二十九年宋萬弑閔公然後殺之於
東宮之西是一督之相宋為之不寧者累世非公與
三國成之而誰耶春秋正黨賊之誅曰成宋亂成宋
累世之亂也宋亂既成而諸國多不討之賊其亂皆
以是而成矣

按杜預左傳註訓成為平今解
為成就之成蓋本何休公羊註

夏四月取郜大鼎于宋戊申納于大廟

明堂位崇鼎貫鼎皆天子之器周公之廟詎少一鼎哉宋有郜之大鼎公以篡主篡取而納之大廟夸示得意於國人主藏之名賴奸之用為大凶德有常無赦宗廟享之乎王道衰義利不明於人心是非臧否與賄轉移篡逆大惡亦可賂免世之不相率為雞鳴之跖者幾何人

秋七月杞侯來朝

武王克殷求禹後得東樓公封之杞去魯為近公初
嗣立杞侯來朝不可謂不敬而兵隨入其國如細民
軌於無道之豪強委命事之猶不免良可哀也已

蔡侯鄭伯會于鄧

按史記楚世家熊通二十三年衛弑其君桓公二十
九年魯弑其君隱公三十一年宋華督弑其君殇公
三十五年楚伐隨使請於王室尊其號三十七年自
立為武王楚以革路藍縷啓國於荆蠻之地雖桀黠

不常而狐嗥鼠拱不出灌莽敗垣間何敢自齒於衣
冠玉帛之國至熊通始有所窺而動蓋中國所以貴
于天下者以三綱五常在焉耳而隱桓之世衛魯宋
並弑其君綱常淪數王法不行楚於是守僭王元氣
憊而客邪入理勢然也蔡鄧與鄭鄰於楚知其將有
所窺而動懼而為此會謀所以待楚者楚之聲采氣
燄已足燶之矣宜其終折而入楚也史遷記自王本
末疑得諸經師之傳

九月入杞

公及戎盟于唐冬公至自唐

此即隱公親戎之故地也公自知大惡不容於天地
戎人亦得而討之故汲汲為唐之盟唐即隱公盟戎
之故地使知我之親戎猶隱之親戎冀戎之親我猶
昔之親隱折節下交而不以為辱也然戎情安可保
哉故至公以危之

三年春正月

元年正月書王以王法正弑立之罪也二年猶望有
以王法討賊者亦書王三年隱喪且除王討竟不加
焉故不書而公之無王王之不王諸侯之不知輔王
其罪具見

公會齊侯于嬴

公昏於齊不待媒介而為嬴之會以定其議得國非
正中正歎然欲挾齊以為安也觀鄭忽以辭昏而失
國則知公之急于求昏意有在矣

夏齊侯衛侯胥命于蒲

春官有九儀之命命出于天而王司之不可私也諸侯可自私乎是時王室雖微猶有錫命齊衛侈然自大不待王命而彼此私相推崇車旗器服超軼命數以夸國人天所以章有德王所以懷萬邦皆為濟私之具矣劉氏謂私相伯即九命之伯也

六月公會杞侯于郕

秋七月壬辰朔日有食之既

日食朔而既陽微之極也夫君陽也臣陰也魯宋比
年弑其君陰之干陽若此咎徵以類而應宜陽宗盡
食以示譴也然陽無終剥之理而剥有復之機日無
竟食之理而既有生之漸天道好還魯宋討賊之義
安知不有時而伸乎

公子翬如齊逆女

親迎之禮廢久矣以大惡之君娶不可防閑之女而
賊翬逆之何凶德之叅會也翬再帥師於隱之世未

賜族故不稱公子公使逆女始以公子稱同惡相濟而賜之族賜族則世為大夫矣此與宋立華氏之意同

九月齊侯送姜氏于譙公會齊侯于譙夫人姜氏至自齊冬齊侯使其弟年來聘

在齊稱女自齊至魯郊稱姜氏入國稱夫人公女歸于天子諸卿皆行公猶不自送齊侯越境送女尋又使寵弟致之皆非禮也女在父母家女師教以婦德

婦言婦容婦功其教素行其德素修也姜氏在齊師
傅之教不嚴閨門之行不肅自齊適魯道阻且長安
保其無單伯子叔姬之辱故齊侯親送于譙而授之
公公會于譙而受之齊侯謹其防也以此為防曾不
免魯道有蕩之刺故易之彖曰勿用取女

有年

自古有年甫田思之以不得見帝王盛時美化洋溢
和氣薰蒸而後能格五穀皆熟之應也今何時而有

年蓋頻歲無年此獨有年有年之寡所以形無年之
多也夫秋方日有食之既而冬繼之有年豈天或未
定耶

四年春正月公狩于郎

郎非其地狩非其時公之始立猶虞宋衛齊鄭之我
討迨今四年鄭以璧田交我宋以郜鼎賂我齊以姜
女妻我而衛則齊之所厚也上無明天子下無賢方
伯尚誰我問于是揚揚合國人狩于遠郊之郎以示

得意而鎮胥動之心鉗竊議之口何暇時與地之計哉

夏天王使宰渠伯糾來聘

宰官渠氏伯爵糾名公濬天之惡王討不加聘又先至章章乎旌逆而勸惡宰通乎四海上穆天緯下維人極宜舉八柄以詔誅廢而愆不知繩繆不知糾躬為行人下聘不道折足覆餗不勝其任矣宰咺歸贈失禮宰糾來聘失刑禮壞刑隳率天下而淪胥繫誰

之咎書糾詳於咺罪重於咺也嗚呼公於是乎高枕

而卧矣是歲不備秋冬二時以見天道之虧

按經無杜秋冬季

預以為史闕文何休則謂桓公無王天子不能誅而反下聘故去二時以為貶原文本何說

五年春正月甲戌己丑陳侯鮑卒

甲戌之下逸其事己丑陳侯鮑卒不必合二日而卒

陳侯也

夏齊侯鄭伯如紀

如紀之行非盟非會非遇非朝果為何事哉二君用

心忮忍而狡險見便逢利則扼喉拊背而奪之何小
之恤義之間是行紀在其目中矣紀不虞二君之涉
吾地自是始恐

天王使仍叔之子來聘

閔黨童子將命子曰非求益者也欲速成者也子路
使子羔為費宰子曰賊夫人之子凡為人子者六年
教之數與方名九年教之數日十年出就外傳十有
三年學樂誦詩舞勺成童舞象學射御二十而冠始

學禮是謂成人然亦未使從政也况聘于四方關國體之輕重專對有辭賓謁有儀一不中度獻笑取侮故雖弓冶之有傳亦必詩禮之素習詎容以乳臭子將事乎桓王之立武氏子來求聘今又使仍叔子來聘寵其父而榮其子不暇顧王命之辱也仍叔聽其子之辱王命烏得無罪

葬陳桓公

城祝丘

秋幕人衛人陳人從王伐鄭

王室無伐久矣書伐大之也而閔周之意存焉大司馬以九伐之法正邦國鄭莊克段誓母入許入鄭伐戴謀紀而成宋亂其麗於九伐非一而負固不服犯令陵政為特甚以畿內之諸侯為王朝之卿士陽為事周而中實無周交質方新而取麥取禾之師繼至交惡已甚而歸祊易許之謀隨動父雖不慈子不可以不孝王固失鄭鄭可以無王哉王問不朝之罪於

鄭宜可以振綱紀伸威令而命將莫知所屬至於親屈萬乘之尊得無棄其威乎齊宋與魯無從者而蔡衛陳從蔡衛陳之君不從而以微者從諸侯拱視繡葛之戰如鄉鄰之鬪卒使鄭人得以犯六龍之顏吁可勝罪耶觀諸侯之意非不知周鄭尊卑之分枉直之情而莫有從王者慮王室之張皆當次第致不朝之討而魯宋之討又不止不朝而已此所以聽周鄭自為勝負也聖人甚欲扶王室以正諸侯而王不善

用其伐故不書天

大雩螽

春官司巫大旱則帥巫而舞雩雩旱禱也又重之以
螽螽蝗類挾旱氣而張肯也有年今也雩螽天其定
乎雩以大書僭天子之禮

冬州公如曹

自相如也告則書

六年春正月寔來

寔人名猶祭伯來之類

夏四月公會紀侯于成

伯姬叔姬皆歸紀婚姻之密宜在宇下隱公時未嘗朝會至此齊鄭垂涎于紀故即公謀之三時之內既會又朝以公交鄭親齊庶幾憐憘之可藉也公身犯大戮何能芘人所以為紀謀者獨有歸女于周恃王為安耳而王亦安足恃哉此屯之上六所以至於泣血漣如也然則為紀當奈何曰強為善而已矣

秋八月壬午大閱

周禮中冬教大閱遂以狩田習戰法而後從獸也前
年狩而不閱今年閱而不狩其於僭禮之中不備禮
可知夫天下之變常出於意料關防之所不及豹殷
養生是已故為國者惟求諸道得道者必多助失道
者必寡助公上無以得助於天下無以得助於人此
心有負常虞見討欲倚城池甲兵以鎮浮弭變城池
修矣甲兵練矣而非常之變乃在房闈衽席間豈意

料關防之所及乎論城必曰懷德惟寧論兵必曰好仁無敵百世不與易也大閱於國故不地

蔡人殺陳佗

左氏文公子佗殺太子免而代之公穀佗淫於蔡而蔡殺之是蔡殺篡陳之賊也佗勇為不義志得意滿翩然輕出宣淫于異境蔡人遂得而殺之篡弑之賊夫人可討使非微行適蔡亦豈談笑所能正其辜哉以此見天網之不漏

九月丁卯子同生

聲子隱母仲子桓母叔姜閔母成風僖母敬嬴宣母齊歸昭母兩定姒襄哀母皆庶也定則昭公之弟成則母穆姜通于僑如文則母聲姜無逆至之日惟文姜逆於公之三年同生於六年以太子之禮舉之重嫡長也且人疑其為齊侯之子春秋謹書日月以別姫明微

冬紀侯來朝

七年春二月己亥焚咸丘

益烈山澤而焚之與焚咸丘皆焚也彼以除民之害
此以縱己之欲夫鳥獸昆蟲與人同生天地間愛生
惡死其情則均故君子親親而仁民仁民而愛物物
之被其愛即吾親親仁民之推耳網四而去三犯五
而發壹豈不能合圍掩羣快一時之欲不忍之心存
焉公忍於同氣若此尚何有於民物火燎于原飛走
蠕動無一得免其憚為特甚而况春方發生之時乎

夏穀伯綏來朝鄼侯吾離來朝

公負天下之大惡而諸侯朝之朝非所當朝也春秋
凡書來朝公皆貶而于特筆累書尤見深疾之意諸
侯不生名失國則名穀鄼同時遠修朝魯之禮雖非
旅見實相先後其降體折節與失國託人國者無異
故因自賤而名之載者培傾者覆造物何心哉四年
無秋冬迄今三歲天道又小變故復不備二時以見
聖人感時悽愴之義

八年春正月己卯燕

天王使家父來聘

前書天王使宰渠伯糾來聘名宰以見聘所非宜聘
後書王使榮叔來錫桓公命王不稱天以見錫非所
當錫今家父之來無貶者使魯主紀婚而至非為公
也凡王姬下嫁王后逆歸皆主魯其來非一日矣

夏五月丁丑烝

黷於祭祀時謂弗欽故高宗彤日有典祀無豐於昵

之戒以祭之明日又祭也魯一歲再舉非時之蒸身
冒大惡而黷祭以徼福神豈歆之哉

秋伐邾

公即位以來滕子首朝杞侯繼朝紀侯又朝穀伯鄆
侯又自遠而朝魯邾錯壤雞犬相聞獨不我朝可謂
知逆順之理矣已則有罪而問人之罪已則無禮而
責人之有禮是伐也惟可加藐乎之邾而已

冬十月雨雪

公政上干陰陽之和積年無雪而是冬雨雪故表而出之

祭公來遂逆王后于紀

天子命魯主紀婚在家父來聘之時祭公之來或曰告逆期寶非也其來猶祭伯來也祭外交于魯非一世因逆后過魯首行外交之私禮而後適紀慢王命而輕王后豈三公體國之義哉

九年春紀季姜歸于京師

自周逆則稱王后自紀歸則稱季姜隨所繫也王者之治天下必有內德之助猶乾之有坤日之有月陰陽配合之義莫重焉太姒興周褒姒滅周正家而天下定不可不謹擇也桓王以隱三年嗣位至此十有八年始逆后以歸豈不輕其選遲之而又久乎

夏四月

秋七月

冬曹伯使其世子射姑來朝

諸侯相見曰朝命世子來朝曹伯之過攝君父來朝射姑之失然亦有故焉公之立非正天王再使下聘齊宋鄭陳列在會盟滕杞穀鄧躬執朝禮而曹與邾小國獨不至邾既伐矣曹不能不為之動以為朝耶義有所不可不朝耶情有所不安于是身以病諉命世子攝而朝執德不剛遂至兩失為人父為人子之道孟子曰如知其非義斯速已矣

欽定四庫全書

經部

春秋說卷

六至

詳校官通政使臣夢吉

給事中臣溫常綬覆勘

謄錄貢生臣吳壽康

謄錄監生臣張曾壇

謄錄監生臣范維城

欽定四庫全書

春秋說卷四

宋 洪咨夔 撰

桓公下

十年春王正月

自三年無王至十年復書王見公雖無王天王雖不
王王法未嘗不存也况四年不備秋冬七年復不備
秋冬至此又三歲矣故書王以正之聖人于十年之
間未嘗一日忘討賊以魯為天下之望魯賊不討世

之亂臣賊子皆得藉為口實慙愧于為魯乃所以為

天下也

按桓十年書王之義何休以為十年者數之終劉敞以為十年者三朝之節桓公至是三

不朝矣故書王以存大法其說較原文為明確附識于此

庚申曹伯終生卒夏五月葬曹桓公

秋公會衛侯于桃丘弗遇

有子曰信近於義言可復也孟子曰言不必信惟義所在信而裁之以義不至為硜硜小人之信矣公與衛先有會期及往會則我拒非衛為不信以見欺裁

以義也公大惡未討當時勢均力齊之國皆與為盟
會惟衛宣公未嘗進之公故急於要衛桃丘之約衛
黽勉諾之然退思吾國嘗有州吁之難陳猶能為致
討魯衛兄弟之國吾坐視其禍亂不之間也已得罪
于黍苗之詩而又會之豈周公康叔之心乎寧違宿
諾毋犯非義翻然悔悟力拒不來公踉蹌獨往躊躇
獨返非所以令國人見也春秋以衛主會為辭以弗
遇文之殺魯恥而善衛之意在其中惜無沐浴請討

以發衛之機者

冬十有二月丙午齊侯衛侯鄭伯來戰于郎

兵出無名事故不成名其為賊敵乃可服公大惡未
討是舉宜有名矣然弑立之君一列于盟會則不復
討既已黨之又復討之則黨為私好討為私仇雖有
名猶無名也公之初立鄭首會垂盟越齊繼會嬴會
鄭而又同成宋亂黨惡昭昭矣然自致女易田之後
不復聘會蓋前是苟以利合其心終慊于義迨衛拒

魯于桃丘其義益著遂合兵為郎之戰而盟會已定
師不可名衛索于齊鄭亦不能自名矣春秋無書來
戰者特于此異其辭罪三國不能名其師也

十有一年春正月齊人衛人鄭人盟于惡曹

三國方來戰于郎尋為惡曹之盟同疎魯也衛宣公
終身與公面目之不覲玉帛之不交齊僖鄭莊則反
覆無常利合勢睽其知義與否判然矣然齊鄭黨賊
之罪固不可悔衛亦未免于縱賊是盟雖同于疎魯

何能爲世道之有無故三國之君皆微而人之以示
貶

夏五月癸未鄭伯寤生卒秋七月葬鄭莊公

九月宋人執鄭祭仲突歸于鄭鄭忽出奔衛

君子殺身以成仁祭仲為鄭相見怵于宋而畏死求
生故書執且人宋立嫡以長不以賢突為忽弟而以
庶子嫡故書突不繫之鄭家嫡君之貳國之本忽為
嗣子而不能守宗廟社稷至于失國出奔故書鄭忽

不繫世子三罪蔽矣其原則莊公之罪也詩曰刑于寡妻至于兄弟以御于家邦兄弟天倫之愛不以薄物細故而間和樂湛孺冲融翕合家人觀而化之子孫則而象之孝友嫋睦之風成乘爭陵犯之意息而積善之家有餘慶矣莊公以閥牆之怨設心措慮必克而後已又極之猶子之所往推刃同氣惜莫甚焉其何以訓厥後馬鬣未燥鵠原已寒一入一出相劙相刃突竟以得宋而庶者立忽竟以失齊而嫡者亡

子亹子儀皆不獲其死積惡之家必有餘殃天之報
施不爽如是哉奕者舉棋必定祭仲苟一旦之命廢
君立君而又求君稔鄭無涯之禍孔子曰苟患失之
無所不至矣仲之謂也公羊以為知權何耶

柔會宋公陳侯蔡叔盟于折

名柔著大夫盟諸侯之始也公將會宋公使柔先為
折之盟以嘗之兩惡相值兩心俱危故也

公會宋公于夫鍾冬十有二月公會宋公于閼

十有二年春正月

夏六月壬寅公會杞侯莒子盟于曲池

秋七月丁亥公會宋公燕人盟于穀丘

八月壬辰陳侯蹠卒

公會宋公子虛冬十有一月公會宋公于龜

丙戌公會鄭伯盟于武父

丙戌衛侯晉卒

十有二月及鄭師伐宋丁未戰于宋

同聲相應同氣相求同惡亦相濟然以勢利而合亦必以勢利而離小人常情也公之初立凜凜乎懼王室之誅列國之討鄭貪于易田首與會盟以植其黨懼心殺矣繼與齊陳鄭同取成宋亂之賂而又昏于齊懼心平矣至天王遣冢宰下聘其罪一洗而空之懼心肆矣故雖衛不我與晏然無求于衛既而齊鄭聘好皆絕而膽始寒始求與衛會衛拒弗會齊鄭又與衛來戰于郎而平日膠漆渙焉冰炭而膽愈寒遂

求好于宋以弑立大惡相似其勢易合既講于折之
盟即為夫鍾之會而子闢于虛于龜繼之其會愈密
其情愈親謂必終二君之身無毫髮之隙而鄭突以
宋責賂無厭來與魯為武父之盟而我有鄭可挾于
是約鄭伐宋遂戰于宋當采葑采菲之日自謂及爾
同死至華落色衰惟恐棄背之不速在同舟遇風之
時不翅左右手及反面若不相識落陷穿又下石焉
立心勿恒凶公之心術可知矣宋魯弑而鄭篡以燕

伐燕何足多較春秋所以悉書其會其伐不厭其詳者著公用心之曲折也

十有三年春二月公會紀侯鄭伯己巳及齊侯宋公衛侯燕人戰齊師宋師衛師燕師敗績

三君之會七國之戰非細故也而春秋不地恥迫魯也紀齊之憾舊鄭宋之憾新魯于齊衛宋之憾重燕則從人者也十年來戰于郎郎吾近邑其勢已迫今龍門之戰又迫于郎戰而勝魯猶可國不勝國其墟

矣故公待紀鄭之集而後戰四國之師既敗績不言
戰可也言及戰而後敗績殊死麌敵而後能敗之也
始為魯危終為魯幸幸豈可恃哉是戰及郎之戰皆
翁婿自為兵主家道窮必乘故受之以睽必至之理
也

三月葬衛宣公

父死不葬爰及干戈武王急于為天下除殘義士猶
或非之宣公晉卒于去年之冬惠公朔戰于今年之

春委几筵而從戎喪師徒而歸葬薄于親而厚于人
人子之心安乎衛侯戰不稱子無人子之心也魯不
以戰廢會葬之禮故錄之

夏大水

元年秋大水今復夏大水陽微而陰盛夫豈一日之
故哉

秋七月

冬十月

十有四年春正月公會鄭伯于曹

公與突之得國其事同故其情親方相與敗四國之師又會于曹以修武父之好係應之私也

無冰

古者藏冰頒冰皆以時出內陰陽之氣也七月之詩曰一之日觱發二之日栗烈又曰二之日鑿冰沖沖三之日納于凌陰觱發建子栗烈建丑鑿冰于栗烈之月則凌陰之納三之日建寅也冬燠至春終無可

藏而後正月以無冰書

按原文謂經從夏正故有此說不知夏正之正月則東風

解凍自應無冰且春秋所以垂尊王之大法豈紀周事而反從夏時哉洪說非是

夏五

史闢文也以己亥為三豕而曲通之鑿矣以華黍由庚為逸而補之贅矣

鄭伯使其弟語來盟

凡使弟來固見相親之情亦其心腹之謀有非他人可與聞者春秋以使非所使例譏之鄭突與忽亹儀

同氣爭國如獵狐兔而猶有寵愛之弟來修前好天
理不以人欲橫流而遂泯於此亦可見矣

秋八月壬申御廩災乙亥嘗

潔爾牛羊以往烝嘗先祖是皇神保是享鬼神洋洋
乎在其上心苟有媿格思難矣公立非其道無以見
祖禰御廩藏粢盛之地而焚之安知非周公魯公意
乎公不知警懼偃然奉黍稷以告西成何受福之有
哉

冬十有二月丁巳齊侯祿父卒

宋人以齊人蔡人衛人陳人伐鄭

宋責鄭賂無厭頻年交兵四國微者將兵從宋伐鄭進退作止一唯宋之聽故以之夫國各其國人各其人兵戎大事而委民命于他人之手左之右之吾不復制無乃輕棄其民乎易曰長子帥師弟子輿尸凶用兵最忌節制之分號令之不一故諸侯能左右他國之師如魯以楚伐齊蔡以吳伐楚宋以齊蔡衛陳

伐鄭無不取勝而還權之一也春秋正誼不謀利其書以皆貶

十有五年春二月天王使家父來求車

王者以萬乘之尊備五路之等常旂麾赤異其制賓祀戎田殊其用輪人輿人軒人創之中車典路車僕掌之其嚴如此至諸侯有功則庸之以車大路之命康叔路車之遣申伯皆異數也車之為用上可以錫下下不可以貢乎上而可求乎先王盛時九貢致邦

國之用雖不貢車而造車百工之需無不貢故其用備今職貢不登王路有闕至于遣使下求求者固非凡王之法而所以致上之求者罪有歸矣毛伯求金武氏子求賄皆不書王求車書天王使家父無貶辭豈非車以闢禮而求出于不得已求財則可以不得已也然書求已見上下之交譏

三月乙未天王崩

天子七月同軌畢至桓王崩周非有大故遠日宜卜

而不卜必有不備于禮者觀求車于未崩之前可見矣

夏四月己巳葬齊僖公

五月鄭伯突出奔蔡鄭世子忽復歸于鄭

弘毅有守則可以託孤寄命頑頓無恥則必至欺君賣國祭仲士君子之節喪久矣方射王中肩之時仲為左拒莫之諫且為公娶鄧曼以固私寵平時無挺直之風臨難安得有堅正之節理所必至也鄭忽以

世子宜立宋莊公誘仲執之要以立突使能見危致
命禍亂可弭而愛身忘國視君如弁髦出忽立突身
遂相之既相之矣以雍糾之謀先發制人于是又出
突而入忽迨忽為高渠彌所弑既不能效孔父仇牧
之死而齊人殺子亹于首止又以知免求生切而名
義之不顧患失重而權數之捷出上有敗則因而構
之有便于己則欺賣而利之身謀善矣社稷何賴焉
鄭伯突出奔不正其君鄭故生名忽復歸于鄭鄭蓋

其有也而弱不能定位故止繫之世子抑揚輕重意各有在

許叔入于許公會齊侯于艾

三國入許之後許叔居許東偏十有五年矣未能反其國也魯齊鄭皆易世叔遂乘鄭方亂而入許太岳之祀以似以續春秋固幸之而入者難詞非鄭亂則許猶不得入也齊魯會于艾以謀定許其難可知是會齊與魯久睽而復合

邾人牟人葛人來朝

公何君也來朝者不絕書滕杞紀異歲而朝穀鄧同時而朝邾牟葛旅至而朝書來朝皆貶而貶有輕重異歲而朝者存其爵同時而朝者則著其名旅至而朝者則人以狄之貶其以事王室之禮事公也邾最近魯不朝不會幾年于此蓋少知順逆之理者今乃與牟葛偕來操執不固懲矯過深為義不終失禮逾甚故與牟葛同其貶

秋九月鄭伯突入于櫟

櫟鄭別都莊公城之過制遂為窟奸藪惡之地入者不正其入也按左氏突殺檀伯居櫟子儀立十有四年突自櫟侵鄭獲傅瑕與盟使納己瑕遂殺子儀而納之始以叔祭仲而立終以叔傅瑕而復險忮深狡可知矣突入櫟之後忽之存亡不見于經而詩人反覆輾轉不能自己既恨其失大國之助又痛其權臣擅命又閔其無忠臣良士國人之情眷眷若此豈為

一無能為之忽哉先君之世子其立正也突據過制
之都又挾諸侯之助一國大勢盡趨之首尾凡幾年
不能遽復其國以非其正人心不與也世道之變故
不一人心之義理常存以人心眷眷于先君世子若
此忽能人百已干彊柔明愚亦何至畢命賊手泯然
不聞于世哉洪範六極弱居末良有以夫

冬十有一月公會宋公衛侯陳侯于袁伐鄭

會而後伐見趙趙猶豫之意鄭莊深狡輕視列國魯

宋衛陳宿憾猶在是舉非愛鄭也抑忽扶突以甚鄭之禍也人欲天理固不兩立而是非邪正終有私欲不能盡蝕者方為是會孰非為突而來突之干嫡則人心所共疾也合無名之師右不正之孽彼此相視中何能安躊躇四顧念助忽則非其志右突則非其義于是黽勉而伐弗克遽還且徐議所以為後圖也褰裳一詩思大國之正已當五國會袁之時決討突定忽之計一舉響振分義昭白豈不大慰涉溱涉洧

之思乎

十有六年春正月公會宋公蔡侯衛侯于曹夏四月公會宋公衛侯陳侯蔡侯伐鄭秋七月公至自伐鄭

天下之事所以使人樂于從而無依違之志勇于進而無反顧之心惟其義而已五國為突伐鄭動非以義故或從或違紛紛乎其不齊去年冬會矣今年春會矣夏又會而後伐志苟堅一何以屢會為哉況會于曹而陳不來會伐鄭而蔡後至依違反顧人人異

意同人惟君子能通天下之志詎可非義而強同哉
觀人心不可強同于非義則公之不義其能逃列國
之指目故至以危之

冬城向

凡城雖時以重民力必書

十有一月衛侯朔出奔齊

朔以讒得國連殺二兄國人不與請于天子而立黔
牟朔以是出奔時衛黨方盛王室衰微彼縱有罪當

討何能遽逐之蓋得人則得國失人則失國以國人之半加王室之半下怨上怒朔不容不出也州吁弑立不討不已朔以讒嗣亦迫之奔衛之人心知義若此魯得無愧乎

十有七年春正月丙辰公會齊侯紀侯盟于黃

公非道得國始而懼未幾安又未幾肆終而驕在位既久齊宋衛鄭陳蔡皆親于我滕杞紀邾鄧穀牟葛皆朝于我疇昔思比其身猶懼不給今則侈然思所

以莊人前年與齊侯會于艾以謀定許去年與諸侯
會于曹以謀納鄭今年又與齊侯盟于黃以謀保紀
字小扶危覆之宇下公為何人敢任斯事多見其不
知量也况齊紀之舊憾新怨方積磨牙澤吻俟機而
發而魯亦凜凜寢蛟抱兕之是虞紀乃主之公與紀
未幾皆墮襄公之穿豈為不幸哉

二月丙午公會邾儀父盟于趙

公穀作及及者內志也隱公初搃欲扳邾以自親故

盟蔑書及公非有求于邾其會而盟歟

夏五月丙午及齊師戰于奚

十二年及鄭師伐宋十三年及齊宋衛燕戰今及齊
師戰于奚又及宋衛伐邾及猶汲汲也公之大惡人
不我討已幸顧敢汲汲稱兵以向人暴虎馮河死而
無悔固惡人之常而弗戢自焚不義自斃亦天理之
必然也况公春與齊盟夏與齊戰對面而肝膽分反
手而爪距露凶狡甚矣書及不書公無君道也恥之

也

六月丁丑蔡侯封人卒秋八月蔡季自陳歸于蔡癸巳葬蔡桓侯

左氏註獻舞即季公羊註封人卒季立獻舞是季未嘗立也其歸如季子之歸魯國人屬之耳季賢內足以繫國人之思外足以得陳人之助可以得國而無心于得子臧季札之流歟方是時兄弟爭國如魯之桓宋之莊陳之厲鄭之突忽以及于齊何可勝數季

獨退然獨立于風靡瀾倒之表其出也既明且哲而無遜尾之厲其歸也不忮不求而有勞謙之吉可不謂賢乎故春秋貴之啖助謂季愛君以禮請謚于王正私謚妄尊之非故書桓侯不書公胡氏從其說及宋人衛人伐邾

公方盟齊而戰方盟邾而伐棄盟不信不信不立其何以行之哉齊以疆場之事猶有可諉邾前見伐不報且率牟葛來朝且盟趙以尋盟蔑之好何所得罪

而媚彊陵弱為是無名之伐積惡滅身禍其至矣

冬十月朔日有食之

十有八年春王正月

桓無王此以王法正其終

公會齊侯于灤公與夫人姜氏遂如齊

艾之會甫數月而戰奚之戰復數月而會公玩齊耶
齊玩公耶易曰困于石據于蒺藜入于其宮不見其
妻凶孟子曰身不行道不行於妻子公據非其位行

非其道何以納姜氏于軌物之中世之敗國亡家大抵自婦人始婦人陰類陰柔易以入人朝薰夕染深鉗肺肝前遮後給密塗耳目于是出入動息一惟婦言是聽父予以是而間兄弟以是而隙家道日睽而豺虎起于衽席身且不保矣敝笱在梁其魚鰈鰈敝敗之笱何能制鰈鰈之巨魚故欲齊其家者所以必先修其身

夏四月丙子公薨于齊丁酉公之喪至自齊

秋七月

冬十有二月己丑葬我君桓公

天下之理未有久屈不伸者久屈而伸有非人力所能及是之謂天天倫相戕之禍入春秋凡幾屈伸本末皆可考不特州吁之討而已也鄭伯容心于克段死骨未寒而公子五爭衛朔設謀于讒攸失國雖復而竟滅其後陳佗殺太子免而嗣立蔡人殺之若斃犬豕然宋馮倚賊督以得國其身僅免而子弑于萬

不寧者累世魯秉周禮天下以為有道之國君臣未嘗相弑而桓首犯大戒天王不正諸侯不伐國人不問幾漏吞舟矣恢網未始漏也干戈之慘潛于嗜欲刀鋸之毒萌于燕笑十八年不討之賊卒假手于彭生而拉之非天歟天道報施不爽若影響契券時有遲速終歸于定使大惡而可逭天地且不立矣隱薨不地而此地隱不葬而此葬其賊在齊不在魯也葬曰我君所以見臣子尊君親上之至情